

Liebi Mitarbeiter

Ich hoffe ihr hend ganz schöni Festtäg gha und sind guet is neue Jahr gstartet :)

Ich möchte mich mit dem Schriebe namal ganz herzlich bi eu allne bedanke für all die supertolle Gschänkli, wo ihr mir bracht hend. Ihr hend de Lüt e rüesse Freud gmacht! Es isch en unglaublichi Erfahrig gsi, a Wiehnachte uf de Gass z si und dene Lüt dörfe es Gschänkli z geh. D Reaktione vo de Mensche sind sehr berührend gsi.

„Ich weiss nöd, wenn ich z letst es Gschänkli becho han“

„Jetzt muss ich nümme trurig si, dass ich keis Gschänkli becho han“

„Ich chan nöd glaube, dass es Mensche git, wo mich trotzdem na gern hend“

„Wieso möchtet mir Lüt überhaupt no öppis schenke? Das berührt mich sehr“

„Jetzt chan ich mim Chind nach 5 Jahr mal es Gschänkli geh zur Wiehnacht“

„Jetzt wird Wiehnachte glich na schön“

„Wow das chan ich nöd glaube, dass mir öpper es Gschänkli macht“

Ihr hend mit eune Gschänkli, so vielne Lüt es Lächle gschänkt!

Das sind nur wenigi Bispiel, vo Ussagene wo d Lüt gmacht hend. Die einte sind i Träne usbroche, anderi sind devo grennt, wills es nöd hend chöne handle, dass mir ihne es Gschänkli, Liebi entgebringe möchtet. Alles wunderschöni Reaktione.

Ingesamt hend mir all zemme über 150 Gschänkli verteilt, a Gasselüt, Drögeler, Prostituierti und sustigi einsami, randständigigi Mensche!

Ich schicke eu da na s paar Fotene womer hend chönne mache. Bitte die Fotis nöd verwende und nöd uf irgendwelchi Medie stelle. Us Respekt dene Lüt gegeüber.

Es sind scho mehreri uf mich zuecho und hend gröggt, ob ich mich nächst Jahr oder bide nächste Aktion wieder würd melde. Das freut mich natürlich sehr und das würdi au sehr gern mache. Da die Päckli Aktion so guet gloffe isch werdemer das sicher wieder mache. Drum meld dich doch bi mir und gib mer e Email Adresse oder e Handynummere, wenn du nächstmal au wieder willsch kontaktiert werde.

Danke eu nomal ganz herzlich und es schöns Tägli!

Liebi Grüessli

Sabrina







Danke liebi Carla und liebi Enny für de Transport vo de Päckli



De Ruedi (li) isch scho langjährige Gassegänger und immer sehr fründlich und dankbar. De Sven (re) isch vor es paar Wuchene us em Gfängnis cho und isch etz imne Reintegrationsprogramm und dut bi eus freiwillig mitschaffe.



Liebe Ireen
Diese Geschenke sind von Menschen, die von dir und deiner Geschichte, deinem Leben gehört haben. Sie möchten dir ihren Respekt, ihre Anerkennung und ihre Hochachtung zeigen. Sie danken dir für dich und alles, was du erreicht hast. Sie sind beeindruckt von deinem Mut, deiner Stärke und deinem grossen Herz.
Sie schätzen dich, weil du, du bist.
In Liebe deine Sabrina



Das isch d Amelia. Sie isch als Chind zur Prostitution zwunge worde und so id Droge cho. Nach Jahre uf de Gass, hemmers vor s paar Jahr gschafft, dass sie ines Wohnheim het chönne gah. Dur de vieli Missbruch und de härte Umgang uf de Gass isch sie physisch leider nümme so fit. Sie het aber en extrem starche Durchhaltewille und en grosse Humor und freut sich immer, wenn ich sie gahne go bsueche.



De Patrick isch sit ca 5 Jahr weg vo de Gass und abgeh vo Methadon und Zigarette clean. Er isch mit 12i uf d Gass cho und ziemli schnell id Droge und in Alkohol abgrutsch. Jetzt wohnt er inere Ussewohngruppe, spielt Theater und schafft imne Beschäftigungsprogramm.





Mit drü volle ichaufswägeli simmer am 25.12.2017 los uf d Gass. Danke mine liebe Helfer!

